



## Johan Hoftijzer

(geb. 08-02-1933)

wonende op boerderij 't Leemkamp,  
vertelt over de bevrijding van de Haart.

*'Ho heb i'j 75 jaor gelaene de bevrijding belaeft,  
en ho denk i'j nao zovölle jaorn daor op terugge?'*

*Dat ongevaer vroeg mi'j, ne schriever van dizzen  
krante, deur den telefoon, begin maart 2020.  
Ho of ik 't belaeft hebbe, hek al is opeschrevvene,  
en ik wil lever neet al te völle in herhaling vallen.  
Blijf oover: "Wat bunt miene gedachten daarover  
no?"*

*Wat 't earste in mi'j opkump? Da'k ter neet  
maer uut hoven 'snachts en naor de schuulkelder  
zobbeken. Daor een paar uur zitten op leuge  
sinasappelkijjes. Altied met de winterjas an;  
ok zommers. Soms nacht op nacht. Dat was op  
bevrijdingsdag, Goede Vrijdag, God zij dank,  
veurbi'j!*


*En wieters? Och, 't veel eigenlijk nog wal met.  
De zorgen dee vader en moder hadden, had  
ik neet. Den lesten winter buw nauwelijks  
naor schole west, maor daor zat ik neet met.  
In't vrogge veurjaor van '45 hek van een old  
iezeren stalraemken, waor 't glas nog in zat, een  
breukkasjen emaaft en daor tabakszaod onder  
ezeijd.*

*Later in den tied de jonge plentjes uut e plant.  
Wal worden mi'j bi'j 't groter worden de schone  
te klein en ni'jen wazzen neet te koop.*

*'k Leep meestal op klompen, maor zondags naor  
de kerke mosten de schone an. Met klompen an  
naor de kerke was onaerbiedig.*

*Deur dee te kleine schone hebt miene tene vake  
te lange bekneld ezaetene en dat köj aj good kiek  
nog zeen. Den groten tee van miene linkerooot  
bi'jveurbeeld wis schuun naor links en den tee  
daornaost lig ter half bovenop.*

*Wat mi'j ok bi'j eblevene is? 't Was soms heel*



*gezellig. Wi'j hadden een tiedlang een stuk of wat  
onderdukens en zondags kwammen de daerns,  
waor ze met gingen. Tine kwam veur Herman,  
Doortjen kwam veur Jan en Gerhard wol Truus  
wal gelukkig maken, maor dat hef nog wal een  
paor jaor eduurd, veur at hee dat veur mekare  
had.*

*Wi'j deen ok spelletjes.*

*"Knijp in de wang en lach niet", bi'jveurbeeld.*

*Dan ginge wi'j in ne groten kring um de grote  
taofele zitten en ene had onzichtbaar ne eierkollie  
binnen handbereik. De anderen wisten dat neet.*

*Ums te beurten mos i'j owen buurman,  
buurorouwin de wange kniepen of in de neuze of  
de aorne. 't Had niks um 't lief wieters, allene den  
met de eierkollie meek zich aerst de vingers good  
zwart, veur at hee knep.*

*Zo kwam den wel naost um zat der al gauw uut  
te zene as een beest; met zwarte wangen, neuze,  
oarne, neum maor op.*

*Wel begon te lachen, mos een of andere opdracht  
uutoern.*



Op ne leuge flesse gaon zitten bi'jveurbeeld;  
't ene been oover 't andere, zo da'j maor  
ene hakke an de grond hadden en dan owen  
name opschrieven. En dat völt nog good  
teggem; probaer 't maor is.

De flesse mos natuurlijk neet op 't ende  
staon, maor dat haj al begreppen!?

Of op daele: Ne schoof stro. Daor mos i'j,  
zonder um an te raken, dwars oover hen  
springen. En in de vlog mos i'j zeggen:  
"Hup, met de konte!"

Iedereen dee met, maor geen ene deed 't  
good. Ze zeien allemaole: "Hup!" met de  
mond en 't mos 'met de konte'!

Waor vader en moder oover in zatten, ik zei  
't al, is grotendeels langs mi'j hen e goane.  
Honger hew nooit e had. Der worden neet  
e klaagd of 't mos waen dat moder geen  
zepe maer had um de wasse te done. Ze had  
an't begin van de oorlog nog wal wat extra  
Sunlicht in e slagene, maor neet genug.

Vader passen zich an ton de tabak op de bon  
kwam. Hee pruimen; maor daor is hee ton  
met op e hollene. Wal nomme aerst at hee 's  
morgens op daele kwam, een sprietjen heuj  
in de mond.

Op Goede Vrijdag, 30 maart 1945, ik zei 't  
al, buw bevrijd en eigenlijk mögge wi'j neet  
klagen. Wi'j bunt as gezin d'r redelijk deur  
e rold. 't Is wal is kort an e west; ik denke an  
den nacht dat een bommentwarper bi'j  
Prange an de grond stoeken en tientallen  
brandbommen um uns hen velen; twee op  
daele.

Of ton den bom bi'j ons veurdeure in de  
weide veel. Geen van ons hef wat met e  
kreggene.

Ok gene van 't N.S.B. gezin dat bi'j ons  
logaern. Twintig mensen, groot en klein.  
Allene; vader was 't paerd kwiet. Vaertien  
dage veur de bevrijding hadden ze dat met e  
nommene. Ze beloven nog wal, dat ze um  
maor één dag neudig hadden. En dan zullen  
ze um waerbrenge. Schurken; is niks van e  
kommene. Wal hef vader dagenlang rond e  
fietst op ne fietse zonder bende naor plaats  
in de Achterhook, waor ne trop paerde bi'j  
mekare stonnen. Maor den van ons was ter  
nooit bi'j. En vader was ne paerdeklaos.  
Wa'k mi'j ok nog herinner as de dag van  
gistern, is het bericht van de ramp in  
't gezin van meester Weenink in Balle.  
Vief kindere in ene klap um e kommene.  
Geen weurde veur. Mien schoonvader  
was timmerman in Balle. Iedereene was  
uutgelaoten en in feeststemming.  
Maor he hef op Paosmaondag samen met de  
gebroeders Ebbers doodkisten emaaft.  
Kan de tegenstelling nog groter?  
'k Heb völle laezene oover den oorlog.  
Nog pas, een book van Arnon Grunberg:  
'Bij ons in Auschwitz'. Vreselijk!  
'k Heb heel wat films ezene oover de oorlog.  
'k Bun op Margraten stille west en in  
Holten en op de Grebbeberg.  
Heel vake nog loop ik op Berkenhove langs  
de grafstene van de militairn dee hier in  
Aalten bunt ummekommen.  
Allemaole jonge kaerls.  
Zonder namen te neumen nem ik in  
gedachten mien hood af veur al dee mensen  
dee met eur laeven betaald hebt, zodat ik nao  
'Goede Vrijdag' in vrae wieter kon laeven.

Jehan Hofti'jzer.

Mer wetten oover de Haortse ervaringen van  
Jehan Hofti'jzer?

Lees dan: "I'j könt 't geleuven of neet" (2002)  
en "No he'k mi'j laoten vertellen" (2006)

Uitgeverij: Fagus